



[Experts](#)

Ulang tahun kemerdekaan negara ke-69: Zahirkan penghargaan kepada anggota keselamatan negara dengan ucapan “Terima kasih atas jasa bakti tuan”

1 September 2026

Bersempena dengan sambutan ulang tahun kemerdekaan negara ke-69 dengan tema ‘Malaysia MADANI: Kesejahteraan Dinikmati’, mari lah kita bersama-sama merenung kembali pahit getir pengorbanan anggota keselamatan negara didalam mempertahankan kemerdekaan tanahair tercinta ini.

Kemerdekaan sesebuah negara daripada penjajahan lazimnya dicapai melalui perjuangan yang berpanjangan dan didorong oleh semangat patriotisme yang tinggi dalam kalangan rakyat. Usaha untuk memperoleh dan mempertahankan kemerdekaan ini membawa kepada penubuhan angkatan tentera yang bertanggungjawab memelihara kebebasan dan keamanan negara daripada sebarang ancaman subversif yang berpotensi mengganggu gugat keselamatan negara.

Di dalam era pascakemerdekaan, anggota keselamatan negara berjuang mempertahankan setiap inci wilayah dengan penuh semangat patriotisme yang menuntut pengorbanan yang amat tinggi. Setiap hari, anggota keselamatan negara baik lelaki mahupun wanita mengenakan pakaian seragam masing-masing dan sentiasa bersiap siaga terhadap sebarang kemungkinan yang boleh mengancam keselamatan negara.

Semangat dan pengorbanan mereka dalam melaksanakan amanah menjaga ibu pertiwi tidak pernah luntur dan tiada tandingannya. Namun begitu, di sebalik keberanian mereka terdapat satu penghargaan kecil yang kadangkala terlepas daripada perhatian kita, iaitu menyatakan kata-kata ucapan tulus iaitu “Terima kasih atas khidmat tuan/puan”.

Anggota perkhidmatan angkatan tentera kita berperanan sebagai benteng pertahanan yang teguh dan sentiasa bersedia menempuh jalan tugas yang penuh dengan bahaya. Kesiapsiagaan mereka melambangkan pengorbanan pada tahap tertinggi apabila meninggalkan keselesaan bersama keluarga dan di rumah demi melindungi kedaulatan negara serta hak rakyat.

Selain itu, khidmat yang mereka curahkan datang bersama risiko yang amat besar. Sama ada ditempatkan di negara asing atau ditugaskan mengawasi sempadan negara, anggota keselamatan perlu sentiasa bersedia menghadapi sebarang cabaran dengan penuh ketabahan dan keazaman yang jitu. Ancaman yang mereka hadapi bukan sekadar konsep yang abstrak, tetapi merupakan realiti fizikal yang menjadi sebahagian daripada kehidupan seharian mereka.

Dalam kesibukan kehidupan seharian, kita mudah terlepas pandang pengorbanan yang dilakukan oleh anggota perkhidmatan ketenteraan kita, sama ada lelaki mahupun wanita.

Namun begitu, satu tanda penghargaan yang sederhana tetapi mampu merentasi batas dan merapatkan jurang antara kehidupan orang awam dan bersama-sama menginsafi setiap pengorbanan tinggi anggota tentera adalah dengan menzahirkan penghargaan dengan mengucapkan kata-kata “Terima kasih atas khidmat tuan/puan”.

Kata-kata ini bukan sekadar suatu ungkapan, malah merupakan manifestasi rasa syukur dan penghargaan terhadap pengorbanan ikhlas yang telah anggota keselamatan kita curahkan pada setiap masa.

Sebagai pewaris masa hadapan, menjadi tanggungjawab kita untuk mendidik dan membimbing generasi akan datang tentang nilai dan amalan menghargai jasa anggota keselamatan negara.

Kita boleh memulakan satu perubahan budaya yang bermakna dengan memberikan teladan yang baik kepada anak-anak dan mengajar mereka tentang kepentingan menghargai serta menghormati orang lain sejak usia muda. Salah satu cara yang mudah tetapi berkesan untuk melakukannya adalah dengan menggalakkan golongan dewasa menunjukkan rasa penghargaan melalui tindakan mudah, iaitu mengucapkan “Terima kasih atas khidmat tuan/puan” apabila bertemu anggota keselamatan di tempat awam.

Apabila kita bertemu dengan anggota keselamatan negara yang berani dan segar mengenakan pakaian seragam mereka, menzahirkan ucapan tulus “Terima kasih atas khidmat tuan/puan” boleh menjadi satu bentuk penghargaan yang bermakna terhadap dedikasi dan pengorbanan mereka.

Walaupun kelihatan seperti satu tindakan yang biasa, ungkapan ini sebenarnya membawa makna yang besar. Ia bukan sahaja melambangkan penghargaan terhadap khidmat yang diberikan oleh seseorang anggota keselamatan, tetapi juga mencerminkan rasa hormat terhadap institusi yang diwakilinya serta perjuangan mulia yang dipertahankannya. Ungkapan tersebut menunjukkan pemahaman yang mendalam terhadap cabaran yang mereka hadapi dan komitmen yang mereka tunjukkan dalam melindungi keselamatan serta kemakmuran negara.

Bayangkan kesan tindakan ini apabila ia tersebar dalam masyarakat. Dalam pertemuan harian dengan anggota beruniform, sama ada ketika menghadiri program kemasyarakatan, majlis awam atau sekadar berselisih di jalan raya, ungkapan penghargaan menjadi satu kebiasaan dan sebahagian daripada budaya sosial kita. Tindakan mengiktiraf jasa dengan ucapan seperti ini bukan sahaja dapat meningkatkan semangat anggota tentera, malah turut memupuk budaya saling menghargai dan menghormati dalam kalangan masyarakat.

Lebih daripada sekadar kesopanan, amalan ini juga membantu memupuk semangat patriotisme dalam diri anak-anak kita. Apabila mereka melihat golongan dewasa mengucapkan terima kasih kepada mereka yang berkhidmat untuk negara, anak-anak akan belajar tentang nilai mengiktiraf dan menghargai sumbangan orang lain. Mereka akan membina rasa bangga yang kukuh terhadap negara serta memahami dengan lebih mendalam pengorbanan yang dilakukan oleh para pelindung negara.

Apabila anak-anak ini membesar, mereka bukan sahaja mewarisi nilai yang diterapkan oleh ibu bapa, malah turut mewarisi budaya masyarakat yang menghargai jasa dan mencintai negara. Mereka akan menjadi sebahagian daripada kesinambungan kisah negara, dengan menghayati nilai perkhidmatan, pengorbanan dan semangat setiakawan. Dengan setiap generasi, semangat dan api patriotisme akan terus dinyalakan semula dan membara dengan lebih kuat dalam jiwa rakyat.

Akhirnya, pengaruh daripada tindakan yang sederhana tetapi penuh makna ini jauh melangkaui masa kini. Ia membentuk asas kepada sebuah masyarakat yang berteraskan rasa hormat, penghargaan dan komitmen bersama demi kebaikan yang lebih besar. Ia juga mengukuhkan ikatan yang menyatukan kita sebagai rakyat Malaysia, melampaui perbezaan latar belakang, kepercayaan dan pandangan hidup.

Pada hakikatnya, dengan membudayakan amalan mengucapkan terima kasih kepada anggota perkhidmatan ketenteraan kita, kita bukan sahaja meningkatkan semangat mereka yang berkhidmat, malah turut menyemai benih masa depan yang lebih cerah untuk negara dan masa depan yang berteraskan nilai murni yang tidak lapuk ditelan zaman, iaitu rasa hormat, penghargaan dan patriotisme.

Dengan menyemai kepentingan mengiktiraf pengorbanan anggota angkatan tentera kita, kita menanam benih patriotisme dalam hati para pemimpin masa hadapan. Dengan memupuk rasa penghargaan, kita membina kecintaan terhadap negara yang tidak mengenal batas. Apabila generasi muda belajar memahami pengorbanan mereka yang berkhidmat untuk negara, mereka akan membina rasa hormat yang mendalam terhadap prinsip dan nilai yang menjadi asas kepada masyarakat kita. Kekaguman ini kemudiannya menjadi asas kepada kesediaan mereka untuk turut berkhidmat kepada negara.

Kesimpulannya, pengorbanan besar yang dilakukan oleh anggota angkatan tentera merupakan salah satu tonggak kekuatan dan ketahanan negara. Dengan mendidik masyarakat untuk menunjukkan penghargaan melalui ungkapan mudah seperti “Terima kasih atas khidmat tuan/puan,” kita bukan sahaja menghormati jasa dan pengorbanan mereka, malah turut memupuk semangat patriotisme yang dapat diwarisi oleh generasi demi generasi.

Marilah kita bersama-sama menzahirkan penghargaan dan berdiri teguh sebagai tanda solidariti bersama mereka yang berkhidmat untuk negara, kerana merekalah yang mempertahankan kebebasan kita dan menjadi penjaga masa depan negara. Para perwira yang berani ini meninggalkan rumah pada setiap pagi untuk berkhidmat kepada negara tanpa mengetahui sama ada mereka akan dapat kembali ke pangkuan keluarga pada penghujung hari.

Bagi para pejuang pejuang yang telah kembali ke rahmatullah, sebagai tanda penghargaan yang setulus-tulusnya dan mengenang pengorbanan mereka, marilah kita berdoa agar Allah SWT mengurniakan ganjaran yang tertinggi kepada mereka. Semoga Allah SWT menempatkan mereka di tempat yang tertinggi di dalam jannah dan menempatkan roh mereka bersama-sama para syuhada.



Oleh: Dr. Abdullah Adnan Mohamed

E-mel: adnan@umpsa.edu.my

Pensyarah Kanan

Pusat Bahasa Moden (PBM)

Universiti Malaysia Pahang Al-Sultan Abdullah (UMPSA)



Oleh: Dr. Mohammad Musab Azmat Ali
E-mel: mmusab@umpsa.edu.my
Pensyarah Kanan
Pusat Bahasa Moden (PBM)
Universiti Malaysia Pahang Al-Sultan Abdullah (UMPSA)



Oleh: Nur Syafawati Sabuan
E-mel: nursya@umpsa.edu.my
Guru Bahasa Kanan
Pusat Bahasa Moden (PBM)
Universiti Malaysia Pahang Al-Sultan Abdullah (UMPSA)

- 44 views

[View PDF](#)